

UNDANG – UNDANG KECIL

CETAKAN SEMULA

**PERINTAH PENGANGKUTAN JALAN (PERUNTUKAN TEMPAT LETAK KERETA)
MAJLIS BANDARAYA SUBANG JAYA 2007**

Mengandungi segala pindaan hingga 10 Disember 2020.

AKTA PENGANGKUTAN JALAN 1987

**PERINTAH PENGANGKUTAN JALAN (PERUNTUKAN TEMPAT LETAK
KERETA) MAJLIS BANDARAYA SUBANG JAYA 2007**

SUSUNAN PERENGGAN

BAHAGIAN I

PERMULAAN

Perenggan

1. Nama, permulaan kuat kuasa dan pemakaian
2. Tafsiran

BAHAGIAN II

PERUNTUKAN AM

3. Peruntukan tempat letak kereta
4. Tidak dibenar letak kereta kecuali di tempat letak kereta
5. Pematuhan syarat
6. Caj yang ditetapkan hendaklah dibayar kepada atendan letak kereta
7. Cara meletak kereta
8. Tidak dibenar meletak kereta tanpa membuat bayaran caj yang ditetapkan
- 8A. Anggapan

BAHAGIAN III

TEMPAT LETAK KERETA BERMUSIM DAN BERTIKET

9. Pematuhan arahan atenden letak kereta
10. Caj tambahan
11. Tidak membayar caj tambahan suatu kesalahan
12. Tidak dibenar meletak kereta tanpa tiket
13. Tiket letak kereta bermusim dan tempat letak kereta bermusim
14. Sekatan terhadap meletak kereta kali kedua dengan menggunakan tiket asal

BAHAGIAN IV

TEMPAT LETAK KERETA BERMETER

15. Tempat letak kereta bermeter
16. Tidak dibenar meletak kereta tanpa membuat bayaran caj yang ditetapkan
17. Tidak dibenar meletak kereta selepas tamat tempoh letak kereta
18. Meter letak kereta yang rosak

BAHAGIAN V

TEMPAT LETAK KERETA BAYAR DAN PERAGA

19. Tempat letak kereta bayar dan peraga
20. Tidak dibenar meletak kereta tanpa membuat bayaran caj yang ditetapkan
21. Mempamer tiket bayar dan peraga
22. Kesalahan
23. Tidak dibenar meletak kereta selepas tamat tempoh letak kereta
24. Meter letak kereta yang rosak
25. Pengeluaran kad meter, pelekat kereta, dsb.

BAHAGIAN VI

TEMPAT LETAK KERETA BERKUPON

26. Pengeluaran kupon letak kereta
27. Pematuhan syarat
28. Penggunaan kupon letak kereta
29. Mempamer kupon letak kereta
30. Kesalahan

BAHAGIAN VII

TEMPAT LETAK KERETA TERKAWAL

31. Tempat letak kereta terkawal
32. Syarat untuk meletakkan kenderaan motor
33. Penalti kerana menghilangkan tiket tempat letak kereta terkawal
34. Tidak boleh meletak kereta tanpa membayar caj yang ditetapkan
35. Caj tambahan

BAHAGIAN VIIA

APLIKASI PEMBAYARAN DALAM TALIAN

- 35A. Bayaran caj yang ditetapkan menggunakan aplikasi pembayaran caj petak letak kereta dalam talian

BAHAGIAN VIII

MENUNDA KENDERAAN MOTOR

- 36. Penghalangan dan pengalihan
- 36A. Pengapitan, pengalihan dan penahanan kenderaan bermotor
- 37. Pelupusan barang atau benda mudah rosak
- 38. Pelupusan kenderaan motor, barang atau benda yang tidak mudah rosak
- 39. Kenderaan motor dialih selepas satu jam
- 40. Majlis tidak bertanggung atas kerugian atau kerosakan

BAHAGIAN IX

PELBAGAI

- 41. Keselamatan kenderaan lain
- 42. Penggantungan tempat atau petak letak kereta
- 43. Tidak boleh menuntut lebih caj letak kereta
- 44. Larangan berdagang atau berniaga
- 45. Larangan membaiki kenderaan motor
- 46. Larangan membasuh atau mencuci
- 47. Larangan menggunakan tempat letak kereta untuk tujuan selain daripada meletak kereta
- 48. Pengalihan tiket, resit atau kompaun
- 49. Gangguan terhadap meter letak kereta
- 50. Kecemasan
- 51. Petak letak kereta khas
- 52. Pendakwaan
- 53. Penalti
- 54. Kuasa untuk mengkompaun
- 55. Penyampaian notis
- 56. Kuasa meminda atau memansuhkan Jadual
- 57. Pemansuhan, peralihan dan pengecualian

JADUAL

AKTA PENGANGKUTAN JALAN 1987

PERINTAH PENGANGKUTAN JALAN (PERUNTUKAN TEMPAT LETAK
KERETA) MAJLIS BANDARAYA SUBANG JAYA 2007

PADA menjalankan kuasa yang diberikan oleh seksyen 72 Akta Pengangkutan Jalan 1987 [*Akta 333*], Majlis Bandaraya Subang Jaya dengan persetujuan Menteri membuat perintah yang berikut:

BAHAGIAN I

PERMULAAN

Nama, permulaan kuat kuasa dan pemakaian

1. (1) Perintah ini bolehlah dinamakan **Perintah Pengangkutan Jalan (Peruntukan Tempat Letak Kereta) Majlis Bandaraya Subang Jaya 2007**.

(2) Perintah ini hanya terpakai bagi kawasan pentadbiran Majlis Bandaraya Subang Jaya dan mula berkuat kuasa pada 19 Julai 2007.

(3) Perintah ini tidaklah terpakai bagi mana-mana ambulan, kereta bomba, kenderaan rasmi angkatan tentera atau polis.

(4) Majlis boleh menggunakan budi bicaranya untuk mengecualikan mana-mana badan atau orang dari membayar apa-apa caj letak kereta yang ditetapkan dalam Jadual.

Tafsiran

2. Dalam Perintah ini, melainkan jika konteksnya menghendaki makna yang lain –

“Akta” ertinya Akta Pengangkutan Jalan 1987;

“aplikasi pembayaran dalam talian” ertinya suatu aplikasi dalam talian yang diluluskan oleh Majlis untuk digunakan sebagai kaedah pembayaran caj yang ditetapkan untuk meletakkan kenderaan motor di mana-mana tempat letak kereta Majlis;

“atendan letak kereta” ertinya mana-mana orang yang dilantik oleh Majlis bagi maksud Perintah ini dan termasuklah mana-mana anggota unit penguat kuasa Majlis dan mana-mana orang yang diberi kuasa oleh atau bagi pihak Majlis untuk menyelia, menguruskan atau menjaga mana-mana tempat letak kereta dan memungut caj yang ditetapkan;

“caj yang ditetapkan” ertinya caj yang ditetapkan dalam Jadual-Jadual bagi pembayaran caj meletak kereta berkenaan dengan kenderaan motor yang diletak di petak letak kereta atau tempat letak kereta;

“elektronik” ertinya teknologi yang menggunakan elektrik, optik, magnetik, elektromagnetik, biometrik, photonik atau teknologi seumpama;

“halangan” ertinya sesiapa yang menghalang atau menyebabkan halangan di petak letak kereta atau di tempat letak kereta awam yang diwartakan di dalam Perintah ini yang diletakkan bukan bagi tujuan letak kereta;

“jalan” ertinya mana-mana jalan awam dan mana-mana jalan lain yang mana orang awam mempunyai akses dan termasuklah jambatan, terowong, hentian sebelah, kemudahan feri, jalan bertingkat, bulatan pulau lalu lintas, pembahagi jalan, segala lorong lalu lintas, bahu jalan, garis tengah, jejambat, jalan tembok, jalan tuju landasan masuk dan keluar, plaza tol, kawasan khidmat dan struktur dan lekapan lain bagi memberi kesan sepenuh kepada penggunaannya;

“jam” termasuklah sebahagian daripada satu jam;

“kenderaan” ertinya suatu struktur yang boleh bergerak atau digerakkan atau digunakan bagi membawa orang atau benda dan yang bersentuhan dengan bumi apabila bergerak;

“kenderaan motor” mempunyai erti yang diberikan kepadanya dalam Akta;

“kenderaan perkhidmatan awam” ertinya kenderaan motor yang digunakan untuk membawa penumpang untuk sewa atau upah atau apa-apa balasan lain;

“kupon letak kereta” ertinya kupon yang dikeluarkan oleh Majlis apabila bayaran dibuat yang di atasnya tercatat caj yang ditetapkan, tempoh masa dan tarikh bagi membenarkan kenderaan motor diletakkan di mana-mana petak letak kereta di tempat letak kereta kecuali di tempat letak kereta terkawal atau tempat letak kereta bermusim untuk tempoh masa yang tersebut pada tarikh itu;

“letak kereta bulanan” ertinya tiket yang dikeluarkan oleh Majlis yang menunjukkan nombor pendaftaran kenderaan motor tempoh sah tiket dan pembayaran caj yang ditetapkan bagi meletak kenderaan motor di mana-mana petak letak kereta di dalam kawasan Majlis;

“Majlis” ertinya Majlis Bandaraya Subang Jaya;

“meletak kereta” ertinya membawa suatu kenderaan motor kepada keadaan yang tidak bergerak dan menyebabkan menunggu bagi apa-apa maksud selain daripada mengambil atau menurunkan dengan serta-merta orang, barangan atau bagasi;

“kad meter” ertinya kad yang dikeluarkan oleh Majlis membenarkan mana-mana orang yang ingin meletakkan kenderaan motornya di tempat letak kereta bayar dan peraga mengikut caj letak kereta yang ditetapkan;

“meter letak kereta” ertinya suatu radas yang dibina dan direka bentuk untuk menerima bayaran bagi meletakkan kenderaan motor di dalam petak letak kereta dan termasuklah tiang besi penyangga atau apa-apa topangan lain yang dipasang kepada radas;

“meter letak kereta bayar dan peraga” ertinya meter letak kereta yang, apabila dimasukkan syiling atau kad meter ke dalam meter dan dengan menekan, memusing atau memetik mana-mana alat yang ditunjukkan di meter letak kereta bayar dan peraga, akan mengeluarkan suatu tiket letak kereta bayar dan peraga;

“meter letak kereta jenis manual” ertinya meter letak kereta yang berfungsi apabila syiling dimasukkan ke dalam meter letak kereta dan kemudian tombol ditekan atau dimetik apa-apa alat lain yang perlu bagi membolehkan syiling diterima oleh meter;

“meter letak kereta jenis automatik” ertinya meter letak kereta yang berfungsi apabila dimasukkan syiling ke dalam meter letak kereta dan kemudian mekanisme di dalam meter letak kereta secara automatik akan menunjukkan tempoh masa kenderaan motor itu dibenarkan diletakkan mengikut nilai syiling yang dimasukkan;

“pemunya kenderaan motor” ertinya mana-mana orang yang merupakan pemunya kenderaan motor yang berdaftar dengan Jabatan Pengangkutan Jalan;

“petak letak kereta” ertinya suatu petak yang ditandakan dengan garisan bercat, tataan, tanda atau tanda lain di tempat letak kereta bagi meletakkan suatu kenderaan motor;

“petak letak kereta khas” ertinya suatu petak letak kereta yang dikhususkan kegunaannya kepada orang, kenderaan motor atau keadaan tertentu dengan bayaran dan petak letak kereta itu ditandakan dengan apa-apa cara yang boleh ditetapkan oleh Majlis;

“syiling” ertinya syiling mata wang Malaysia;

“tempat letak kereta” ertinya suatu tempat yang diasingkan sebagai tempat di mana kenderaan motor atau mana-mana kelas atau perihalan kenderaan motor yang dinyatakan diletak;

“tempat letak kereta bayar dan peraga” ertinya tempat letak kereta di mana meter letak kereta bayar dan peraga digunakan;

“tempat letak kereta berelektronik” termasuklah kad bayar dengan atau tanpa sentuh;

“tempat letak kereta berkupon” ertinya suatu tempat letak kereta seperti yang dinyatakan dalam Jadual Pertama di mana kaedah berkupon digunakan;

“tempat letak kereta bermeter” ertinya suatu tempat letak kereta di mana letak kereta jenis manual atau meter letak kereta jenis otomatik digunakan;

“tempat letak kereta bermusim” ertinya suatu tempat letak kereta yang bayarannya dibuat secara bulanan dan petak letak kereta itu ditandakan dengan apa-apa cara yang boleh ditetapkan oleh Majlis;

“tempat letak kereta bertiket” ertinya tempat letak kereta seperti dinyatakan dalam Jadual Pertama di mana bayaran caj yang ditetapkan adalah mengikut jam dan untuk

setiap jam kenderaan motor diletakkan di petak letak kereta, tiket akan dikeluarkan oleh atendan letak kereta yang menyatakan kadar caj;

“tempat letak kereta terkawal” ertinya suatu tempat letak kereta bagi kenderaan motor yang waktu masuk dan keluar dari tempat letak kereta tersebut dicatatkan oleh atendan letak kereta atau mesin tiket jenis automatik dan tempoh meletak kereta adalah dikira daripadanya;

“tiket letak kereta” –

- (a) berhubung dengan tempat letak kereta bertiket ertinya tiket yang dikeluarkan oleh atendan letak kereta yang padanya boleh dinyatakan nombor pendaftaran kenderaan motor, caj yang ditetapkan, tarikh serta tempoh masa kenderaan motor itu dibenar diletakkan; dan
- (b) berhubungan dengan tempat letak kereta terkawal ertinya tiket yang dikeluarkan oleh atendan letak kereta atau mesin tiket jenis automatik yang tempoh meletak kereta adalah dikira daripadanya;

“tiket letak kereta bayar dan peraga” ertinya tiket yang dikeluarkan oleh meter letak kereta bayar dan peraga yang di atasnya tercatat nombor pendaftaran kenderaan motor, tarikh, tempat dan tempoh masa bagi meletakkan kenderaan motor di tempat letak kereta bayar dan peraga;

“tiket letak kereta bermusim” ertinya tiket yang dikeluarkan oleh Majlis yang menunjukkan nombor pendaftaran kenderaan motor, tempoh sah tiket dan caj yang ditetapkan bagi meletak kenderaan motor di tempat letak kereta bermusim; dan

BAHAGIAN II

PERUNTUKAN AM

Peruntukan tempat letak kereta

3. Tempat letak kereta yang dinyatakan dalam ruang (1) Jadual diperuntukkan bagi penggunaan kenderaan motor dan hendaklah tertakluk kepada Akta dan Perintah ini.

Tidak dibenar letak kereta kecuali di tempat letak kereta

4. Tiada seorang pun boleh meletak suatu kenderaan motor, menyebabkan, membenarkan mana-mana kenderaan motor diletakkan atau menunggu di mana-mana tanah, bangunan, jalan atau mana-mana bahagian jalan melainkan di tempat dan petak letak kereta yang disediakan oleh Majlis.

Pematuhan syarat

5. Mana-mana orang yang meletak kenderaan motor di tempat letak kereta hendaklah mematuhi apa-apa syarat yang dikenakan oleh Majlis bagi penggunaan tempat letak kereta itu.

Caj yang ditetapkan hendaklah dibayar kepada atendan letak kereta

6. Tiada seorang pun melainkan atendan letak kereta boleh mengutip caj letak kereta yang ditetapkan dari mana-mana pemandu atau pemunya kenderaan motor bagi penggunaan tempat letak kereta.

Cara meletak kereta

7. (1) Mana-mana orang yang meletakkan kenderaan motor di petak letak kereta yang disediakan oleh Majlis hendaklah meletakkan kenderaan motor dengan cara yang berikut:

- (a) kenderaan motor itu hendaklah dalam kedudukan yang kenderaan motor itu secara keseluruhannya berada di dalam petak letak kereta;
- (b) kenderaan motor itu hendaklah diletakkan mengikut arah lalu lintas dan hendaklah mematuhi semua isyarat lalu lintas yang ditunjukkan di tempat letak kereta;
- (c) pemandu kenderaan motor hendaklah mematikan enjin kenderaannya sebaik sahaja berada di dalam petak letak kereta; dan
- (d) tidak merintanginya mana-mana garisan petak letak kereta yang telah ditandakan.

(2) Jika mana-mana kenderaan motor yang diletak di petak letak kereta melanggar subperenggan (1), mana-mana atendan letak kereta atau mana-mana pegawai polis yang beruniform boleh mengalih atau menyebabkan dialih kenderaan motor itu supaya kedudukannya mematuhi subperenggan (1) dan pemandu atau pemunya kenderaan motor itu hendaklah mematuhi apa-apa arahan yang sah di sisi undang-undang yang diberikan oleh atendan letak kereta atau pegawai polis yang beruniform itu.

Tidak dibenar meletak kenderaan motor tanpa membuat bayaran caj yang ditetapkan

8. Tiada seorang pun boleh meletak mana-mana kenderaan motor di tempat letak kereta atau petak letak kereta tanpa membuat bayaran caj yang ditetapkan dalam waktu terkawal yang ditentukan dalam ruang (4) Jadual.

Anggapan

8A. Bagi maksud apa-apa prosiding di bawah Perintah ini mana-mana orang yang gagal mengemukakan bukti bayaran caj yang ditetapkan bagi tempoh kenderaan motornya diletakkan dalam petak letak kereta hendaklah dianggap, sehingga dibuktikan sebaliknya, telah meletakkan kenderaan motornya di petak letak kereta tanpa membayar caj yang ditetapkan dan adalah melakukan suatu kesalahan.

BAHAGIAN III

TEMPAT LETAK KERETA BERMUSIM DAN BERTIKET

Pematuhan arahan atendan letak kereta

9. (1) Mana-mana orang yang meletakkan kenderaan motornya di tempat letak kereta bertiket hendaklah mematuhi segala arahan yang berkaitan dengan urusan meletakkan kenderaan motor yang diberi kepadanya oleh mana-mana atendan letak kereta di tempat letak kereta itu.

(2) Sebaik sahaja sesebuah kenderaan motor diletakkan di petak letak kereta di tempat letak kereta bertiket atendan letak kereta hendaklah mengeluarkan tiket letak kereta dan meletakkan tiket itu pada cermin hadapan atau mana-mana bahagian kenderaan motor yang mudah dilihat dan pemandu atau pemunya kenderaan motor hendaklah membayar caj yang ditetapkan dalam tempoh 14 hari dari tarikh tiket itu dikeluarkan.

(3) Jika kenderaan motor yang baginya tiket letak kereta telah dikeluarkan masih berada di petak letak kereta selepas tamat tempoh sejam dari masa tiket letak kereta itu dikeluarkan maka atendan letak kereta hendaklah mengeluarkan tiket letak kereta yang lain dan hendaklah terus berbuat demikian pada akhir tiap-tiap jam.

Caj tambahan

10. (1) Mana-mana orang yang melanggar peruntukan di bawah subperenggan 9(1) hendaklah membayar kepada Majlis caj tambahan sebanyak empat ringgit bagi setiap jam di mana kenderaan motor itu telah diletakkan tanpa membuat bayaran caj letak kereta.

(2) Bayaran hendaklah dibuat dalam tempoh 14 hari dari tarikh notis dikeluarkan oleh Majlis.

Tidak membayar caj tambahan adalah satu kesalahan

11. Mana-mana orang yang gagal mematuhi subperenggan 10(1) dalam tempoh yang ditetapkan di bawah subperenggan 10(2) adalah melakukan suatu kesalahan.

Tidak dibenar meletak kenderaan motor tanpa tiket

12. Tiada seorang pun boleh –

- (a) meletakkan, menyebabkan atau membenarkan mana-mana kenderaan motor diletak di mana-mana tempat letak kereta bertiket tanpa tiket letak kereta; atau
- (b) terus meletak, menyebabkan atau membenarkan mana-mana kenderaan motor terus diletak di petak letak kereta selepas tamat tempoh masa suatu kenderaan itu dibenarkan diletak.

Tiket letak kereta bermusim dan tempat letak kereta bermusim

13. (1) Tiada seorang pun boleh meletakkan, membenarkan atau menyebabkan diletak mana-mana kenderaan motor di tempat atau petak letak kereta bermusim tanpa tiket letak kereta bermusim.

(2) Suatu tiket letak kereta bermusim boleh diperolehi setelah membuat bayaran caj yang ditetapkan dalam Jadual Keempat dan hendaklah tertakluk kepada apa-apa syarat yang ditetapkan oleh Majlis.

(3) Suatu tiket letak kereta bermusim boleh dibatalkan oleh Majlis pada bila-bila masa tanpa memberi apa-apa sebab.

(4) Tiket letak kereta bermusim yang sah hendaklah dipamerkan di cermin hadapan kenderaan motor yang mudah dilihat pada setiap masa bagi memastikan pandangan atendan letak kereta tidak terhalang untuk memeriksa tiket itu ketika kenderaan motor itu diletakkan di tempat letak kereta bermusim.

Sekatan terhadap meletak kereta kali kedua dengan menggunakan tiket asal

14. Tiada seorang pun yang telah mengalihkan kenderaan motornya dari satu petak letak kereta sebelum tamat tempoh yang dibenarkan bagi meletakkan kenderaan motor itu berhak meletakkan kenderaan motor itu dalam petak yang sama bagi kali keduanya dengan syarat petak letak kereta yang sama masih kosong dan pemandu atau pemunya kenderaan motor itu masih mempunyai tiket asal yang belum tamat tempoh bagi meletakkan kenderaan motor dan hendaklah ditunjukkan kepada atendan letak kereta yang bertugas dengan mempamer semula di cermin hadapan kenderaan motor itu.

BAHAGIAN IV

TEMPAT LETAK KERETA BERMETER

Tempat letak kereta bermeter

15. Suatu tempat letak kereta bermeter boleh dibahagikan kepada petak-petak letak kereta dan tiap-tiap satu petak hendaklah disediakan satu meter letak kereta jenis manual atau meter jenis otomatik.

Tidak dibenar meletak kenderaan motor tanpa membuat bayaran caj yang ditetapkan

16. (1) Tiada seorang pun boleh meletak apa-apa kenderaan motor di tempat letak kereta bermeter tanpa membuat bayaran caj yang ditetapkan.

(2) Sebaik sahaja kenderaan motor diletakkan di petak letak kereta, pemandu atau pemunya kenderaan motor hendaklah membayar caj yang ditetapkan dengan memasukkan syiling ke dalam meter letak kereta sebagaimana yang ditunjukkan pada meter letak kereta yang sama nilainya dengan amaun caj yang ditetapkan bagi apa-apa tempoh yang kenderaan itu hendak diletak.

Tidak dibenar meletak kenderaan motor selepas tamat tempoh letak kereta

17. (1) Tiada seorang pun boleh membenarkan atau menyebabkan kenderaan motor itu terus berada di petak letak kereta selepas habis tempoh masa kenderaan motor itu dibenarkan diletak sebagaimana ditunjukkan di meter letak kereta.

(2) Mana-mana orang yang ingin melanjutkan tempoh letak kereta hendaklah, sebelum atau sebaik sahaja habis tempoh letak kereta terdahulu, memasukkan syiling ke dalam meter letak kereta yang sama nilainya dengan amaun caj yang ditetapkan bagi apa-apa tempoh lanjutan yang dikehendaknya sehingga tempoh maksima yang dibenarkan pada sesuatu masa.

Meter letak kereta yang rosak

18. (1) Mana-mana orang yang meletak kenderaan motor di petak letak kereta bermeter mendapati meter letak kereta itu tidak berfungsi atau rosak hendaklah memberitahu atendan letak kereta mengenai hal itu.

(2) Apabila hal yang tersebut dalam subperenggan (1) telah disahkan, atendan berkenaan hendaklah mengeluarkan suatu resit rasmi yang padanya hendaklah ditulis—

(a) nombor pendaftaran kenderaan motor itu;

(b) tarikh dan tempoh masa kenderaan motor itu dibenarkan diletak di petak letak kereta bermeter itu yang sama dengan amaun syiling yang dikatakan telah dimasukkan ke dalam meter letak kereta itu; dan

(c) menampalkan suatu salinan pendua resit rasmi itu pada cermin hadapan atau mana-mana bahagian kenderaan motor itu yang mudah dilihat.

(3) Atendan letak kereta hendaklah menampalkan pada mana-mana meter letak kereta yang tidak berfungsi atau rosak suatu notis bagi maksud itu atau menutup meter letak kereta itu dengan suatu penutup atau dengan apa-apa cara lain yang difikirkan patut.

BAHAGIAN V

TEMPAT LETAK KERETA BAYAR DAN PERAGA

Tempat letak kereta bayar dan peraga

19. Sesuatu tempat letak kereta bayar dan peraga boleh dibahagikan kepada petak-petak letak kereta dan bagi sebilangan petak letak kereta itu sebagaimana yang ditentukan oleh Majlis hendaklah disediakan dengan satu meter letak kereta bayar dan peraga.

Tidak dibenar meletak kenderaan motor tanpa membuat bayaran caj yang ditetapkan

20. (1) Tiada seorang pun boleh meletak apa-apa kenderaan motor di petak letak kereta bayar dan peraga tanpa membuat bayaran caj yang ditetapkan dalam Jadual Pertama dan Jadual Ketiga.

(2) Pemandu atau pemunya kenderaan motor hendaklah sebaik sahaja meletakkan kenderaan motornya di tempat letak kereta bayar dan peraga membuat bayaran caj yang ditetapkan dengan memasukkan ke dalam meter letak kereta bayar dan peraga syiling atau kad meter sebagaimana yang ditunjukkan pada meter letak kereta bayar dan peraga yang sama nilainya dengan amaun yang ditetapkan bagi apa-apa tempoh kenderaan motor itu hendak diletak.

Mempamer tiket bayar dan peraga

21. (1) Setelah menerima tiket letak kereta bayar dan peraga, pemandu atau pemunya kenderaan motor hendaklah mempamerkan tiket itu di atas papan pemuka menghadap cermin hadapan atau mana-mana bahagian kenderaan motor yang mudah dilihat bagi memastikan pandangan atendan letak kereta tidak terhalang untuk menyemak tiket berkenaan ketika kenderaan motor itu diletakkan di tempat letak kereta bayar dan peraga.

(2) Tiket letak kereta bayar dan peraga sah digunakan di mana-mana tempat letak kereta kecuali di tempat letak kereta bermusim dan tempat letak kereta terkawal, dengan syarat hanya kenderaan motor yang sama sahaja boleh menggunakannya dan tempoh masa dan tarikh yang dinyatakan di atas tiket letak kereta bayar dan peraga masih belum tamat.

(3) Tiket letak kereta bayar dan peraga yang telah diubah, dipinda, dirosakkan atau dilipat hendaklah menjadi tidak sah walaupun tempoh masa dan tarikh yang dinyatakan masih belum tamat.

(4) Tiket letak kereta bayar dan peraga di bawah Jadual Pertama adalah tidak sah digunakan di mana-mana tempat letak kereta bayar dan peraga di bawah Jadual Ketiga.

(5) Tiket letak kereta bermusim adalah sah digunakan di mana-mana tempat letak kereta di bawah Jadual Ketiga hanya untuk tempoh satu (1) jam sahaja.

Kesalahan

22. Mana-mana pemandu atau pemunya kenderaan motor yang –

(a) gagal mempamerkan tiket letak kereta bayar dan peraga yang sah dengan jelas; atau

(b) mempamerkan tiket letak kereta bayar dan peraga yang telah tamat tempoh,

adalah melakukan suatu kesalahan di bawah Perintah ini.

Tidak dibenarkan meletak kenderaan motor selepas tamat tempoh letak kereta

23. (1) Tiada seorang pun boleh membenarkan atau menyebabkan mana-mana kenderaan motor terus berada di petak letak kereta bayar dan peraga selepas tamat tempoh masa kenderaan motor itu dibenarkan diletak sebagaimana yang ditunjukkan pada tiket letak kereta bayar dan peraga.

(2) Mana-mana orang yang ingin melanjutkan tempoh letak kereta hendaklah memperoleh tiket letak kereta bayar dan peraga yang baru dengan memasukkan syiling atau kad meter ke dalam meter letak kereta yang sama nilainya dengan amaun caj yang ditetapkan bagi apa-apa tempoh yang dikehendaki.

(3) Mana-mana orang dibenarkan untuk melanjutkan tempoh meletak kereta hanya bagi tempoh satu (1) jam tambahan sahaja selepas tamat tempoh pertama di mana-mana tempat letak kereta di bawah Jadual Ketiga.

Meter letak kereta yang rosak

24. (1) Mana-mana orang yang meletak kereta di tempat letak kereta bayar dan peraga yang mendapati meter letak kereta bayar dan peraga tidak berfungsi atau rosak hendaklah memberitahu atendan letak kereta mengenai hal itu.

(2) Atendan letak kereta yang disebut di bawah subperenggan (1) hendaklah mengesahkannya dan hendaklah, di atas pengesahan itu –

- (a) mengeluarkan suatu resit rasmi yang di atasnya hendaklah ditulis nombor pendaftaran kenderaan motor itu, tarikh dan tempoh masa kenderaan motor itu dibenarkan diletak di petak letak kereta bayar dan peraga yang sama kadarnya dengan amaun syiling atau kad meter yang dikatakan telah dimasukkan ke dalam meter letak kereta bayar dan peraga; dan
- (b) menampal salinan pendua resit rasmi di cermin hadapan atau mana-mana bahagian kenderaan yang mudah dilihat.
- (3) Atendan letak kereta hendaklah menampalkan pada mana-mana meter letak kereta bayar dan peraga yang tidak berfungsi atau rosak bagi maksud itu atau menutup meter letak kereta bayar dan peraga itu dengan suatu penutup atau dengan apa-apa cara yang difikirkan patut.

Pengeluaran kad meter, pelek kereta, dsb.

25. Majlis atau mana-mana orang yang diberi kuasa oleh Majlis boleh mengeluarkan kad meter setelah caj yang ditetapkan bagi meletak kenderaan motor di tempat letak kereta bayar dan peraga dijelaskan.

BAHAGIAN VI

TEMPAT LETAK KERETA BERKUPON

Pengeluaran kupon letak kereta

26. Majlis atau mana-mana orang yang diberi kuasa oleh Majlis boleh mengeluarkan kupon letak kereta setelah caj yang ditetapkan dalam Jadual Pertama dijelaskan bagi meletakkan kenderaan motor di tempat letak kereta berkupon.

Pematuhan syarat

27. (1) Mana-mana orang yang menggunakan kupon letak kereta hendaklah mematuhi syarat yang dinyatakan pada kupon letak kereta.

(2) Mana-mana orang yang gagal mematuhi syarat-syarat yang dinyatakan pada kupon letak kereta adalah melakukan suatu kesalahan.

Penggunaan kupon letak kereta

28. Mana-mana orang yang menggunakan kupon letak kereta boleh meletak kenderaan motornya di mana-mana petak letak kereta di tempat letak kereta kecuali di tempat letak kereta bermusim dan tempat letak kereta terkawal.

Mempamer kupon letak kereta

29. (1) Mana-mana pemandu atau pemunya kenderaan motor yang menggunakan kupon letak kereta hendaklah mempamerkan kupon itu di atas papan pemuka menghadap cermin hadapan atau mana-mana bahagian kenderaan motor yang mudah dilihat bagi memastikan bahawa pandangan atendan letak kereta tidak terhalang untuk memeriksa kupon itu ketika kenderaan motor diletakkan di tempat letak kereta berkupon.

(2) Jika lebih dari satu kupon diperlukan untuk digunakan di tempat letak kereta berkupon, pemandu atau pemunya kenderaan motor hendaklah mempamerkan kesemua kupon itu pada masa yang sama.

(3) Kupon letak kereta yang telah digunakan mengikut tempoh masa yang diperlukan hendaklah menjadi tidak sah jika kupon itu dipinda, diubah, dirosakkan atau dilipat.

Kesalahan

30. Jika pemandu atau pemunya kenderaan motor –

(a) gagal mempamerkan kupon letak kereta yang sah dengan jelas; atau

(b) mempamerkan kupon letak kereta yang telah tamat tempoh,

adalah melakukan suatu kesalahan di bawah Perintah ini.

BAHAGIAN VII**TEMPAT LETAK KERETA TERKAWAL****Tempat letak kereta terkawal**

31. Sesuatu tempat letak kereta terkawal boleh dibahagikan kepada petak-petak letak kereta sebagaimana yang ditentukan oleh Majlis.

Syarat untuk meletak kenderaan motor

32. (1) Mana-mana orang yang meletak kenderaan motor di tempat letak kereta terkawal hendaklah mendapatkan tiket letak kereta yang dikeluarkan oleh atendan letak kereta atau mesin tiket jenis automatik di pintu masuk tempat letak kereta itu dan pada tiket itu dinyatakan tarikh serta waktu masuk ke tempat letak kereta berkenaan.

(2) Setelah menerima tiket letak kereta, pemandu atau pemunya kenderaan motor hendaklah menyimpan tiket itu untuk diserahkan kembali kepada atendan letak kereta di pintu keluar dan dia hendaklah membuat bayaran caj yang ditetapkan dalam Jadual Ketiga.

Penalti kerana menghilangkan tiket letak kereta terkawal

33. Mana-mana pemandu atau pemunya kenderaan motor yang kehilangan tiket letak kereta ataupun telah merosakkan tiket itu hendaklah membayar caj tambahan sebanyak lapan ringgit kepada atendan letak kereta.

Tidak boleh meletak kenderaan motor tanpa membayar caj yang ditetapkan

34. Tiada seorang pun boleh meletakkan mana-mana kenderaan motor di petak letak kereta terkawal tanpa membayar caj yang ditetapkan atau apa-apa caj tambahan yang dikenakan di bawah perenggan 33 atau 35.

Caj tambahan

35. Mana-mana orang yang telah meletakkan kenderaan motornya melebihi tempoh letak kereta yang ditetapkan hendaklah membayar caj letak kereta yang ditetapkan itu dan caj tambahan sebanyak sepuluh ringgit sehari.

Bahagian VIIA

APLIKASI PEMBAYARAN DALAM TALIAN

Bayaran caj yang ditetapkan menggunakan aplikasi pembayaran caj petak letak kereta dalam talian

35A. (1) Mana-mana orang yang meletakkan kenderaan motornya di tempat letak kereta yang ditentukan dalam ruang (3) Jadual dalam waktu terkawal yang ditentukan dalam ruang (4) Jadual boleh memilih untuk membayar caj petak letak kereta yang ditetapkan dalam Jadual melalui aplikasi pembayaran dalam talian bagi apa-apa tempoh yang dikehendakinya.

(2) Mana-mana orang yang menggunakan aplikasi pembayaran dalam talian untuk membayar caj petak letak kereta yang ditetapkan hendaklah mematuhi syarat-syarat yang dinyatakan dalam aplikasi tersebut sebagaimana ditetapkan oleh Majlis.

(3) Mana-mana orang yang gagal mematuhi syarat-syarat yang dinyatakan dalam aplikasi pembayaran caj petak letak kereta dalam talian adalah melakukan suatu kesalahan.

BAHAGIAN VIII

MENUNDA KENDERAAN MOTOR

Penghalangan dan pengalihan

36. (1) Tiada seorang pun boleh—

- (a) menghalang atau menyebabkan terhalang mana-mana tempat atau petak letak kereta; atau
- (b) meletakkan suatu kenderaan motor, menyebabkan, membenarkan mana-mana kenderaan motor diletakkan atau menunggu di mana-mana tanah, bangunan, jalan atau mana-mana bahagian jalan melainkan di tempat atau petak letak kereta yang disediakan oleh Majlis.

(2) Mana-mana pegawai yang diberi kuasa oleh Majlis, mana-mana atendan letak kereta atau mana-mana pegawai polis boleh mengunci menunda, mengalih dan menahan mana-mana kenderaan motor, apa-apa barang atau benda yang –

- (a) menghalang atau menyebabkan terhalang mana-mana tempat atau petak letak kereta;
- (b) menggunakan mana-mana tempat atau petak letak kereta bagi maksud menjalankan apa-apa perdagangan atau perniagaan;
- (c) menghalang atau menyebabkan terhalang mana-mana meter letak kereta di tempat atau petak letak kereta;
- (d) menggunakan tempat atau petak letak kereta bagi mempamerkan kenderaan motor untuk jualan;
- (e) menghalang atau menyebabkan terhalang mana-mana tempat atau petak letak kereta yang dikhaskan untuk orang kurang upaya;
- (f) menghalang atau menyebabkan terhalang mana-mana pili bomba di tempat atau petak letak kereta;
- (g) diletakkan atau menunggu di mana-mana tanah, bangunan, jalan atau mana-mana bahagian jalan selain di tempat atau petak letak kereta yang disediakan oleh Majlis; atau
- (h) berkenaan dengannya terdapat pelanggaran terhadap, atau ketakpatuhan kepada mana-mana peruntukan Perintah ini.

(3) Mana-mana kenderaan motor, apa-apa barang atau benda yang telah ditahan dan dialihkan hendaklah disimpan di depoh atau mana-mana tempat simpanan yang ditentukan oleh Majlis.

Pengapitan, pengalihan dan penahanan kenderaan bermotor

36A. (1) Jika mana-mana pemandu sesuatu kenderaan motor menyebabkan atau membenarkan kenderaan motor itu dihentikan di mana-mana jalan dalam apa-apa kedudukan atau apa-apa keadaan atau apa-apa hal keadaan yang mungkin menyebabkan bahaya, galangan atau kesusahan tidak berpatutan kepada pengguna jalan yang lain atau kepada lalu lintas, mana-mana pegawai yang diberi kuasa oleh Majlis, mana-mana attenden letak kereta atau mana-mana pegawai polis, boleh mengapit roda kenderaan motor itu atau mengalihkan atau menyebabkan supaya dialih kenderaan motor itu ke mana-mana jalan lain atau mana-mana lokasi atau tempat lain sebagaimana yang dinyatakan dalam suatu notis dan ditinggalkan di situ atas risiko pemunya.

(2) Jika sesuatu kenderaan motor diapit rodanya di bawah perenggan (1), mana-mana pegawai yang diberi kuasa oleh Majlis, mana-mana attenden letak kereta atau mana-mana pegawai polis yang berkenaan hendaklah dengan segera, memberikan notis secara bertulis kepada pemunya kenderaan motor itu memaklumpkannya tentang pengapitan roda itu dan menghendaknya atau mana-mana orang yang mungkin mempunyai tuntutan terhadap kenderaan motor itu, dalam tempoh empat jam dari waktu notis itu, untuk hadir dan meminta supaya kenderaan itu dilepaskan dan jika tidak ada tuntutan diterima dalam tempoh itu, kenderaan motor itu bolehlah dialihkan ke tempat yang sesuai.

(3) Jika mana-mana kenderaan motor ditahan di bawah perenggan (1) atau (2), mana-mana pegawai yang diberi kuasa oleh Majlis, mana-mana attenden letak kereta atau mana-mana pegawai polis yang berkenaan hendaklah dalam masa dua puluh empat jam, memberikan notis secara bertulis kepada pemunya kenderaan motor itu memaklumpkannya mengenai pengalihan itu dan menghendaknya atau mana-mana orang yang mungkin mempunyai tuntutan terhadap kenderaan motor, dalam tempoh satu bulan dari tarikh notis itu, supaya hadir dan menuntut kenderaan itu.

(4) Selepas tuntutan diterima di bawah perenggan (2) atau (3), kenderaan motor itu bolehlah dilepaskan setelah dibayar fi bagi pengapitan, pengalihan dan penahanan sebagaimana yang ditetapkan oleh Majlis di bawah Perintah ini.

(5) Jika dalam tempoh dua belas bulan dari tarikh pengalihan itu kenderaan motor itu tidak dituntut, kenderaan motor itu hendaklah dilucuthakkan dan keempunyaan kenderaan motor itu terletak hak pada Majlis.

(6) Mana-mana pegawai yang diberi kuasa oleh Majlis, mana-mana attenden letak kereta, mana-mana pegawai polis atau mana-mana orang lain yang bertindak di bawah arahnya, mengikut mana-mana yang berkenaan, tidak boleh menanggung apa-apa liabiliti berkenaan dengan apa-apa kerugian atau kerosakan yang disebabkan kepada mana-mana kenderaan motor atau kelengkapan atau kandungannya semasa ia diapit atau dialihkan atau semasa ia ditahan melainkan jika kerosakan itu disebabkan oleh kecuaiian atau dengan sengaja.

Pelupusan barang atau benda mudah rosak

37. (1) Majlis boleh mengarahkan supaya apa-apa barang atau benda yang dialih di bawah subperenggan 36(2) yang merupakan jenis mudah rosak, dilupuskan atau dijual dan apa-apa hasilnya, jika ada, bolehlah dituntut oleh tuan punya barang atau benda tersebut selepas ditolak segala perbelanjaan yang ditanggung oleh Majlis bagi pengalihan, pelupusan atau penjualan barang atau benda itu.

(2) Jika tiada tuntutan dibuat selepas tamat tempoh 30 hari dari tarikh penjualan itu, hasil jualan itu hendaklah dikreditkan ke dalam pendapatan Majlis.

Pelupusan kenderaan motor, barang atau benda yang tidak mudah rosak

38. (1) Pemunya kenderaan motor atau barang atau benda yang tidak mudah rosak yang telah dialihkan dan ditahan di bawah subperenggan 36(2), boleh dalam masa 30 hari dari tarikh pengalihan itu menuntut kenderaan motor atau barang atau benda itu daripada Majlis setelah membayar kepada Majlis semua bayaran dan perbelanjaan yang ditanggung oleh Majlis bagi pengalihan dan penahanan itu.

(2) Majlis boleh menetapkan apa-apa borang dan mengenakan apa-apa syarat bagi membuat tuntutan apa-apa kenderaan motor atau barang atau benda yang ditahan.

(3) Jika tiada tuntutan dibuat berkenaan dengan pengalihan tersebut dalam subperenggan (1), Majlis boleh mengarahkan supaya kenderaan motor atau barang atau benda itu dijual atau dilupuskan mengikut cara yang difikirkan sesuai oleh Majlis dan segala hasil yang diperolehi daripadanya hendaklah dikreditkan ke dalam pendapatan Majlis.

Kenderaan motor dialih selepas satu jam

39. (1) Walau apa pun peruntukan perenggan 36, jika kenderaan motor diletak secara berterusan selama lebih daripada 24 jam di tempat atau petak letak kereta setelah tempoh letak kereta telah tamat, kenderaan motor itu boleh dialih oleh mana-mana atendan letak kereta, mana-mana pegawai yang diberi kuasa oleh Majlis atau mana-mana pegawai polis daripada tempat atau petak letak kereta itu dan disimpan di tempat yang ditentukan di bawah jagaan Majlis.

(2) Mana-mana kenderaan motor yang dialih di bawah subperenggan (1) boleh ditahan oleh Majlis sehingga semua caj letak kereta yang kena dibayar berkenaan dengan penggunaan tempat atau petak letak kereta sehingga masa kenderaan itu dialihkan dan segala perbelanjaan yang ditanggung oleh Majlis dalam mengalih dan menahan kenderaan itu dijelaskan kepada Majlis.

Majlis tidak bertanggung atas kerugian atau kerosakan

40. Majlis atau mana-mana atendan letak kereta tidaklah bertanggung atas apa-apa kerugian atau kerosakan pada mana-mana kenderaan motor dalam menguatkuasakan Perintah ini.

BAHAGIAN IX

PELBAGAI

Keselamatan kenderaan motor lain

41. Tiada kenderaan motor boleh ditarik, dipandu atau ditolak dalam kawasan tempat letak kereta kecuali dengan cara yang teratur dan cermat dan dengan mengambil perhatian terhadap keselamatan lain-lain kenderaan motor dan orang di dalam kawasan tempat letak kereta itu.

Penggantungan tempat atau petak letak kereta

42. (1) Majlis boleh menggantung penggunaan mana-mana tempat atau petak letak kereta apabila penggantungan itu difikirkan perlu –

- (a) bagi maksud memudahkan pergerakan lalu lintas atau mewujudkan keselamatan lalu lintas;
- (b) bagi maksud menjalankan apa-apa kerja binaan, perobohan atau pengorekan yang berdampingan atau berdekatan dengan tempat letak kereta, bagi penyelenggaraan, pemajuan atau pembinaan semula tempat letak kereta, pemasangan, pendirian, pengubahan atau pembaikan mana-mana betung, kabel, paip atau peralatan untuk bekalan air, elektrik, talian telefon atau telegraf yang berdampingan atau berdekatan dengan tempat letak kereta;
- (c) bagi menyenangkan penghuni premis yang berdampingan atau berdekatan dengan tempat letak kereta ketika mengadakan upacara rasmi atau agama atau peristiwa lain yang tertentu; atau
- (d) bagi apa-apa sebab lain yang difikirkan patut oleh Majlis.

(2) Atas apa-apa penggantungan yang disebutkan terdahulu, mana-mana pegawai Majlis yang diberi kuasa hendaklah menampalkan suatu notis bagi maksud itu yang berhampiran atau di tempat atau petak letak kereta dan adalah menyalahi undang-undang bagi mana-mana orang meletak apa-apa kenderaan motor di tempat atau petak letak kereta itu melainkan jika ia berhubungan bagi maksud penggantungan itu dibuat.

(3) Jika mana-mana orang memerlukan penggunaan mana-mana petak atau petak-petak letak kereta digantung bagi tujuan persendirian, suatu permohonan bagi penggantungan itu hendaklah dibuat kepada Majlis dengan menyatakan lokasi, nombor petak letak kereta dan tempoh penggantungan yang diperlukan dan orang itu hendaklah membayar kepada Majlis apa-apa caj yang ditetapkan oleh Majlis untuk tempoh penggantungan itu.

Tidak boleh menuntut lebih caj letak kereta

43. Mana-mana orang yang telah mengeluarkan kenderaan motornya dari suatu petak letak kereta sebelum tamat tempoh masa yang dibenarkan untuk meletak kenderaan motor itu tidak berhak untuk menuntut apa-apa lebih caj letak kereta yang telah dibayar bagi lebih masa yang tidak digunakan.

Larangan berdagang atau berniaga

44. Tiada seorang pun boleh menggunakan mana-mana tempat atau petak letak kereta bagi maksud menjalankan apa-apa perdagangan atau perniagaan.

Larangan membaiki kenderaan motor

45. Tiada seorang pun boleh membaiki mana-mana kenderaan motor atau membenarkan kenderaan motor dibaiki di tempat letak kereta kecuali dalam hal pembaikannya perlu untuk membolehkan kenderaan motor itu dialih daripada petak letak kereta itu.

Larangan membasuh atau mencuci

46. Tiada seorang pun boleh mencuci, membersihkan, menyebabkan, membenarkan dicuci atau dibersihkan mana-mana kenderaan motor di tempat atau petak letak kereta.

Larangan menggunakan tempat letak kereta selain daripada untuk meletak kenderaan motor

47. Tiada seorang pun boleh meletak atau mempamerkan apa-apa notis atau iklan pada mana-mana kenderaan motor untuk menjual kenderaan itu semasa kenderaan itu diletakkan di tempat atau petak letak kereta atau menggunakan kenderaan motor yang diletakkan di tempat atau petak letak kereta selain tujuan meletak kereta.

Pengalihan resit, tiket atau kompaun

48. Tiada seorang pun melainkan seorang yang diberi kuasa oleh Majlis boleh mengalih atau menyebabkan dialih apa-apa resit, tiket atau notis kompaun yang dikeluarkan oleh mana-mana atendan letak kereta atau mana-mana pegawai yang diberi kuasa oleh Majlis yang ditampalkan pada cermin hadapan atau mana-mana bahagian kenderaan motor yang mudah dilihat semasa ianya diletakkan di tempat atau petak letak kereta.

Gangguan terhadap meter letak kereta

49. Tiada seorang pun boleh mengalih, mengetuk, mengganggu atau mengusik perjalanan meter letak kereta atau cuba melakukan mana-mana dari perbuatan sedemikian, tanpa kuasa yang sempurna menampal atau cuba menampal apa-apa pelekat, iklan, notis, senarai, dokumen, papan atau benda pada, mengecat atau menulis atas, merosakkan atau selainnya menyalahgunakan mana-mana meter letak kereta.

Kecemasan

50. Dalam keadaan kecemasan, mana-mana atendan letak kereta atau mana-mana pegawai polis beruniform boleh mengalih atau menyebabkan dialih ke mana-mana tempat yang difikirkan sesuai mana-mana kenderaan motor yang diletak di tempat atau petak letak kereta.

Petak letak kereta khas

51. (1) Tiada seorang pun boleh meletak kenderaan motor di mana-mana petak letak kereta yang disediakan oleh Majlis sebagai petak letak kereta khas yang ditetapkan di dalam Jadual Kedua.

(2) Suatu permohonan bagi menggunakan petak letak kereta khas hendaklah dibuat mengikut apa-apa bentuk yang ditetapkan oleh Majlis. Pemohon hendaklah membuat pembayaran caj seperti ditetapkan di dalam Jadual Kedua apabila permohonan diluluskan.

(3) Majlis pada bila-bila masa boleh, membatalkan kelulusan suatu petak letak kereta khas tanpa memberi apa-apa sebab.

(4) Mana-mana orang yang meletakkan kenderaan motornya di petak letak kereta khas hendaklah mematuhi segala arahan yang diberi kepadanya oleh mana-mana atendan letak kereta di petak letak kereta khas itu.

(5) Tiada seorang pun boleh meletakkan, menyebabkan, atau membenarkan diletak mana-mana kenderaan motor di petak letak kereta khas tanpa kelulusan daripada Majlis.

Pendakwaan

52. (1) Mana-mana pegawai yang diberi kuasa secara bertulis oleh Pendakwa Raya boleh menjalankan pendakwaan bagi mana-mana kesalahan yang dilakukan di bawah Perintah ini.

(2) Tiada pendakwaan bagi sesuatu kesalahan di bawah Perintah ini boleh dimulakan kecuali oleh atau dengan keizinan bertulis Pendakwa Raya.

Penalti

53. Mana-mana orang yang melakukan apa-apa kesalahan di bawah Perintah ini apabila disabitkan boleh dikenakan denda tidak melebihi tiga ratus ringgit dan selanjutnya membayar kepada Majlis apa-apa bayaran yang terhutang dan kena dibayar di mana-mana peruntukan Perintah ini.

Kuasa untuk mengkompaun

54. (1) Apa-apa kesalahan yang dilakukan di bawah Perintah ini boleh dikompaun oleh mana-mana pegawai yang diberi kuasa oleh Menteri di bawah seksyen 120 Akta Pengangkutan Jalan 1987.

(2) Jumlah wang yang dikutip bagi mengkompaun apa-apa kesalahan di bawah Perintah ini hendaklah tidak melebihi tiga ratus ringgit.

(3) Tawaran untuk mengkompaun apa-apa kesalahan dan penerimaan tawaran kompaun hendaklah dibuat dalam borang yang ditetapkan oleh Majlis.

Penyampaian dokumen

55. Mana-mana pegawai Majlis yang diberi kuasa untuk menyampaikan apa-apa notis, perintah, kompaun atau apa-apa dokumen yang dikehendaki disampaikan di bawah Perintah ini boleh –

- (a) meletak dan meninggalkannya di mana-mana bahagian kenderaan motor yang berkenaan dengannya notis, perintah, kompaun atau apa-apa dokumen itu dikeluarkan agar mudah dilihat oleh pemandu atau pemunya kenderaan motor itu dan penyampaian itu dianggap sebagai sempurna;
- (b) menyerahkan kepada penama yang di atas namanya notis, perintah, kompaun atau dokumen itu dikeluarkan;
- (c) sekiranya penyampaian secara kediri tidak dapat dilakukan, penyampaian secara ganti boleh dibuat dengan meninggalkan notis, perintah, kompaun atau dokumen itu di alamat biasa yang terakhir yang diketahui;
- (d) melalui pos berdaftar ke alamat biasa yang terakhir yang diketahui; atau
- (e) dengan cara mengiklankannya dalam mana-mana akhbar harian.

Kuasa untuk meminda atau memansuhkan Jadual

56. Majlis boleh menambah, meminda atau membatalkan kesemua atau mana-mana bahagian dalam mana-mana Jadual di bawah perintah ini sekiranya Majlis berpendapat adalah perlu untuk berbuat demikian.

Pemansuhan, peralihan dan pengecualian

57. (1) Perintah Pengangkutan Jalan (Peruntukan Mengenai Tempat Letak Kereta) Majlis Perbandaran Subang Jaya, 1999 [*Sel.P.U 43/1999.*] dengan ini dimansuhkan.

(2) Apa-apa notis, perintah, kompaun atau dokumen yang telah dikeluarkan atau dibuat terdahulu hendaklah terus terpakai dan berkuat kuasa seolah-olah telah dikeluarkan atau dibuat di bawah Perintah ini sehingga dibatalkan.

Dibuat oleh Majlis Perbandaran Subang Jaya dalam mesyuaratnya pada 31 November 2006.

ADNAN BIN HAJI MD. IKSHAN
Yang Dipertua
Majlis Perbandaran Subang Jaya